



Aştîye welê ziwanan ra nê, azadîya înan ra pêda bena

Azadîya ziwani, stûnanê tewr bingeyênan ê estbîyayîşê şaran ra yew a. Coka heqê ziwani dayîke ser o vera sîyasetê înkâr, asîmîlasyon û tasfîyeyî têkoşîndayîş, her çî ra verî yew îcabêko nêvazbîyaye yê merdimbîyayîşî yo. Ziwani dayîke; vîr, nasname û bingeyê estbîyayîşê azadî yê şaran o. Pawitişê nê heqî; şertêko nêvazbîyaye yê cuyêka komelkîya têduşte, azade û demokratîke yo. Yew komelo ke ziwani xo yê dayîke ra qut bîyo, tena yew ziwani nê; tehlûkeyê vîndîkerdişê tarîx, kultur, heqîqetê xo yê neteweyî û komelkî reyde zî têrî maneno.

Tirkîya de ferasetê netewe-dewlete yo yewperest û wişk merkezî, zey vizêrî ewro zî vera estbîyayîşê ziwani û kulturî yê şaran sîyasetanê xo yê înkâr, asîmîlasyon û tasfîyeyî rameno. Rixmê heme têkoşînê komelkî û waştîşanê şarê Kurdî, sîyaset û pratîkê ke vera estbîyayîşê ey ê ziwani û kulturî yenê ramitene, mîsalê nê yê tewr şênber î.

Tirkîya de netîceya sîyasetanê înkâr û asîmîlasyonî de zaf ziwani qedîmî resayê sînorê vîndîbîyayîşî û no tehlûke her ke şono zêdêr beno. Ubixkî û Yewnankîya Kapadokya bi temami vîndî bîyê; lehçeya qedîme ya Kurdî; Zazakî/Kirmanckî, Lazkî, Hemşinkî, Abazakî, Çerkeskî, Suryankî, Yunankîya Pontusî, Ermenkîya Rojawanî û Romankî zî binê tehdîtê vîndîbîyayîşêkê cîdîyî de rê.

Komelo demokratîk; yew cuya wina ya ke ferqîyîyetî tede nêyenê înkarkerdene, eksê ci azadane est ê. Azadîya ziwani prensîbê bingeyên yê na cuye yo; derheqê ziwani dayîke de heme heqî nêvazbîyaye yê. Aştîya komelkîye, bi ferzkerdişê yewperestîye nê; bi naskerdişê ziwanan, nasnameyan û kulturan ê sero bingeyê têduştîye û azadîye mumkun a.

Coka heqê musayîş, xebitnayîş, averberdiş û sey ziwani perwerdeyî weçînayîşî yê ziwani xo yê dayîke yê heme şaran ganî bîyero binê garantîye. Cuya gelemperî bi yew feraseto zafziwan û têduştîyabawer ganî newe ra bêra serûberkerdene. Yew aştîya adîle û komelo demokratîk tena yew zemîno ke ziwani tede azad ê, de eşkenê bêrê awankerdene.

Sere de Birêz Abdullah Ocalan, bi xebatanê zaf derûdorani heta ewro yo ke arîyayo, çarçeweya prosesê Aştîye û Komelê Demokratîkî de, derheqê viraştîşanê qanûnan ê ke do Meclîs de bêrê kerdene de, pawitiş û waştîşê şarê Kurdî û heme şaran zelal ê. Ferasetê hîyerarşîk, yewperest, teberkerdox, qedexeker û asîmîlasyonkarî ganî biqedîyê; huqûqê serdestan nê, huqûqê mîyanê têduştan ganî bêro ronayene. Mîyanê ziwanan de serdestîye nê aştîye; mîyanê nasnameyan de tahakkum nê têduştîye ganî bêra pêardene. Seba aştîya komelkîye, sere de perwerdeyê ziwani dayîke, heqê ziwani ganî bîyerê binê garantîye û biresê statuyêkê qanûnî.

Pawitişê azadîya ziwanan, awankerdişê azadîye û aştîya komelî yo.

Bi wesîleyê 21ê Sibate Roja Ziwani Dayîke ya Dinya ma reyna bin xêz kenê: Azadîya ziwani, bingeyê komelê demokratîkî û aştîya bi rûmet a. Coka ma her kesî dawetê berzkerdişê têkoşînê ziwani dayîke kenê.

Heme Ziwani rê Têduştîye û Azadîye!

Ziwani Dayîke Estbîyayîş, Nasname û Rûmetê Ma yo.